

### Izvještaj sa 33. sjednice Općinskog vijeća Ilijaš

Nakon ljetne pauze danas je u velikoj sali Općine Ilijaš održana 33. sjednica Općinskog vijeća sa 17 tačaka dnevnog reda.

Nakon vijećničkih pitanja i inicijativa jednoglasno je usvojen Izvještaj o izvršenju Budžeta Općine Ilijaš za period 01.01.-30.06.2015. godine. Budžet Općine Ilijaš u navedenom periodu bilježi 4.050.356,00 KM ostvarenih prihoda, što je 45% od planiranih prihoda u Budžetu za 2015. godinu. Sa druge strane, ostvareni su izdaci u iznosu od 3.957.576,00 KM, što predstavlja 44% od planiranih izdataka u Budžetu za 2015. godinu. Ostvaren je suficit za navedeni period u iznosu od 92.780,00 KM.

Vijećnici su na današnjoj sjednici jednoglasno podržali i Prijedlog Odluke o izmjenama i dopunama Pravilnika o stipendiranju učenika i studenata u stanju socijalne potrebe kojim je predviđeno da se imovinski cenzus sa dosadašnjih 100,00 KM, po članu porodice poveća na 120,00 KM kao i Prijedlog Odluke o izmjenama i dopunama Pravilnika o stipendiranju i nagrađivanju izuzetno nadarenih učenika i studenata kojom je planirano da pravo učešća na konkursu za stipendiranje imaju studenti koji nisu obnavljali godinu, a pohađaju fakultete Univerziteta u Sarajevu iz grupacije medicinskih nauka, tehničkih i biotehničkih nauka bez obzira na ostvareni prosjek ocjena iz prethodne akademske godine. Ovaj Pravilnik je predložen od strane Općinskog načelnika u cilju podsticanja mladih ljudi da se opredijele za studiranje u područjima koja su priznata kao strateški važna u globalnom svijetu.

Izmjenama Pravilnika je predviđeno i da se studenti diplomanti nosioci priznanja "Srebrna značka Univerziteta u Sarajevu" nagrade novčanom nagradom u iznosu od 150,00 KM za razliku od dosadašnje prakse kada su se nagrađivali samo nosici "Zlatne značke Univerziteta u Sarajevu".

Vijećnici su usvojili i predloženi Plan stipendiranja učenika i studenata u visokoškolskom obrazovanju u školskoj 2015/2016. godini prema kojem je planirano stipendiranje 43 učenika i 26 studenata u stanju socijalne potrebe i 46 izuzetno nadarena učenika i 64 izuzetno nadarena studenta.

Zbog isteka mandata razriješeni su članovi Općinske izborne komisije g. Velid Fazlić i Momčilo Kojić a ujedno je i usvojena Odluka o raspisivanju javnog oglasa za imenovanje dva člana općinske izborne komisije Ilijaš.

Vijećnici su jednoglasno podržali Odluku o davanju saglasnosti na Memorandum i Aneks Memoranduma o razumijevanju s ciljem podrške radu ustanovama kulture od općeg značaja i interesa za Bosnu i Hercegovinu, za period 2016.-2018. godine u iznosu od 18.000,00 KM na godišnjem nivou.

U cilju da se na načelima saradnje i osjećaja javne odgovornosti pomogne u očuvanju kulturne baštine Bosne i Hercegovine Općinski načelnik je 15.septembra 2015. godine u Parlamentarnoj Skupštini BiH potpisao Memorandum i Aneks Memoranduma o razumijevanju s ciljem podrške radu ustanovama kulture od općeg značaja i interesa za Bosnu i Hercegovinu, za period 2016 - 2018. godina, nakon čega je nakon tri godine ponovno za posjetioce otvoren Zemaljski muzej u Sarajevu.

Na 11. tački Dnevnog reda našao se Prijedlog Odluke o izmjenama i dopunama Odluke o odobravanju i isplati sredstava na ime troškova prijevoza djece sa posebnim potrebama, prema kojoj se novčana sredstva za prijevoz djece s posebnim potrebama koji se školuju ili pohađaju predškolske ustanove u Sarajevu određuje u mjesečnom iznosu od 100,00 KM a za djecu koja pohađaju predškolske ustanove na području Općine Ilijaš u iznosu od 50,00 KM.

Usvojene su i Odluke o neposrednoj pogodbi za prodaju neizgrađenog građevinskog zemljišta Banovac u površini od 32 m<sup>2</sup> i zemljište u obuhvatu Regulacionog plana „Centar“

u Ilijašu u površini od 26 m<sup>2</sup>, kao i Prijedlog Odluke o načinu i uslovima prodaje neizgrađenog građevinskog zemljišta u vlasništvu Općine Ilijaš, putem javnog nadmetanja radi izgradnje stambeno-poslovnog objekta u površini od 672 m<sup>2</sup> i parking prostora u površini od 170 m<sup>2</sup> upisano u K.O. SP\_Višnjica.

Razriješen je dužnosti Predsjednik Komisije za mlade i obrazovanje g. Midhat Džafo, predstavnik Socijaldemokratske unije BiH a na mjesto Predsjednika Komisije za mlade i obrazovanje izabrana je g. Belma Kamenjaš, predstavnica Socijaldemokratske Unije BiH.

Razriješen je dužnosti člana a time i zamjenik predsjednika Etičke komisije g. Amar Dovadžija predstavnik Stranke demokratske akcije, a na mjesto zamjenika predsjednika imenovana je g. Masnopita Muamera predstavnica Stranke demokratske akcije.

Usvojena su i pojedina rješenja iz imovinsko-pravne oblasti, a najviše pažnje vijećnika je privukao Izveštaj o radu Komisije za poslove mjesnih zajednica i saradnju sa drugim općinama i gradovima OV-a Ilijaš, koji se odnosi na obilazak Savjeta MZ-a Općine Ilijaš i radu Savjeta mjesnih zajednica Općine Ilijaš od preuzimanja mandata pa nadalje.

Komisija za poslove Mjesnih zajednica je sačinila detaljan Izveštaj a Predsjednik Komisije g. Mehmed Smajlović kroz kraće izlaganje je vijećnicima pojasnio sadržaj Izveštaja s akcentom na realizovane i započete Projekte. I Predsjednici Savjeta Mjesnih zajednica također su imali priliku prezentirati probleme s kojim se svakodnevno susreću u svom radu a Općinsko vijeće je jednoglasno usvojilo Izveštaje uz Zaključak da: „Koordinator za rad mjesnih zajednica zajedno sa Komisijom za poslove mjesnih zajednica i Predsjednicima Savjeta u roku od 60 dana dostavi Općinskom vijeću konkretan prijedlog mjera za poboljšanje i unaprijeđenje rada Savjeta mjesnih zajednica.